

眉州屬志卷十七

藝文志

賦 詩

賦

宋

六孝賦

爲胡文貴等六人作

文 噩

萬彙人最靈稟受性各殊爲士雖若賢爲民豈盡
愚一心倘行孝百行誠難逾丹稜乃古邑四川視
西區斯民競禮讓厥土惟膏腴余祖昔化導斯文
今誕敷粵有四庶民父母咸抱瘡痛親因疾疹剖

眉州屬志

卷十七 賦

一

股爰極圖胡生亦爲甚楊氏其再乎復講二孝子
負土成其瑜杯羹起沉痾守廬洫朝脯豈不念毒
楚盖思勞且劬昊天旣罔極而乃甘脉癘挾彈鄙
昔人返哺同林烏伊爾實編伍挺操非宗儒口亡
詩書悟心與曾閔俱異哉衆所羨昭然德不孤聞
者咸聳聽行者忘遵途共嗟稀聞事復此綿聯鋪
吾君恢至治教化浹四隅旌表榮賞勸粟帛恩沾
濡純孝冀錫類清風敦薄夫非才叨宰邑聞善增
忻愉斐辭刻琬琰列名實闡闡懷賢情景慕事親

宜便輸勿使豐碑上獨美斯人徒

南征賦

唐 庚

始攝提之孟冬余負罪而南馳雪盈尺而更煩風
三日而猶吹體凍極而若無心怖甚而亡悲凡再
信而至許覺驚魂之稍歸訪景福之遺基指空郊
之荒礫曾禾黍之無有矧欒梁之丹腹國已挹於
三馬臣不聞於一鶚豈當世之無儒抑此病之難
藥道昆陽而流嘆淡悲風與愁雲階一夫之僭竊
紛萬鬼之煩冤嘆世祖之論功忘王章之曩言既

眉州屬志

卷十七 賦

二

直鈎之不食終曲突之無恩過叔子之舊邦登峴
山而痛哭方關右之放賈盖眼中之拔鏃獨何心
而表畱卒養癰而潰肉倘遺靈之猶在當衆白而
相沃盡荊州之犖确瞰蜀江之湯湯念故人之久
別覺良晤之甘香稍回翔於澧浦忽凌亂於瀟湘
時廓舒而浩蕩復收斂而淒涼咏九歌之餘哀閔
三閭之孤趨豈公子之足怨實舉國而無與內不
憚於女嬃外見非於漁父持此道以奚歸亦各安
於所處自是遠矣行人漸稀水愈激而愈清山益

削一作刻而益竒造柳嶺之窮處云湟澗之故基客

至此兮返顧雁至此兮北飛眷剡溪之毒淫吊文
淵之矍鑠射參狼於隴阪觀跼鳶於浪泊奮身出
於萬死騰口喧於百惡信老子之是哀覺少遊之
差樂經韶陽而再宿寫石上之遺聲悟聖神之在
宥如天地之生成彼禽魚固自有理而日用未嘗
不明雖吹萬之不同吾得一而皆正捨眞陽之矩
策放清遠之孤舟戲碧落之靈秘嘲峽山之媚柔
承縣崖之滴乳搯梟岸之垂樛探羊城於浩茫發
蒲澗於深幽窮一時之詭觀渺萬古之清愁盖明
年之正月矣始稅駕於羅浮

皇清

玻璃江賦

汪 櫪州人

暮頤山色暎青蘋瀲灩水光接玉津林薄蒼茫天
欲晚江鄉臺畔月如銀故老告余曰此所謂玻璃
江也嗟哉吾聞繁盛之世端月人日士女如雲出
其東門挈榼載道攜手問津紅袂燦臨江之影華
騶多踏石之聲此固輿地之所紀勝也而今何以

眉州屬志

卷十七 賦

三

僅得之傳聞然人事雖非往昔川原未變滄桑奔騰不竭吐納猶常煙霞迭幻景象無方大化未有止息四序終無盡藏若夫春日載陽平沙徐步一點桃紅三分杞綠提屐履兮幾兩偕童冠兮五六羨錦鱗兮泳游看鴛鴦兮出沒芳紫茸茸兮依稀杜若之洲幽香馥馥兮髣髴猗蘭之谷爾乃買一葉於中流舉汗樽以相屬弱柳舞小蠻之腰欸乃發舟人之曲讜論啟而風生微吟斷而鶯續縱所如以舒懷勝彈絲而品竹其或杜鵑啼歇紫燕飛

眉州屬志

卷十七 賦

四

揚落花成陣謝絮交颺鋪渚中之茵蓐綴水面之文章爽氣滿川兮火雲燦爛濃蔭夾岸兮化日舒長於是遊子追涼飈而擊楫爭開襟以倘佯恍乎入水晶之闕歷光碧之堂遊清虛之府涉飄渺之鄉迨玉露橫流金風捲擗畔繞芙蓉底沉碧落登春風之樓陟明霞之閣攜酒呼盧催詩擊鉢重縱目於涯鄰覺炤人其隱約淼淼茫茫汗汗汨汨連長天而耀彩橫素練以揚焞鴈拖秋景龍帶晚煙皓魄照層潭而欲澈流光和雲漢以爭妍至若繁

霜降汀草凋凝烟鬱鬱踈荻蕭蕭水落石出岍濶
天高風摧平野月湧寒濤梅香浮動兮橫斜澤畔
雪英皓汗兮倒暎林杪雖萬象之零落寧四顧而
寂寥且夫空濛山影蕩漾風痕漁舟短笛月下踈
砧隨其興之所至足之所經接於目而爲色得之
耳而成聲何日不飄飄乎曲江之浦洋洋乎錦水
之濱亂曰江之大不可極兮江之深不可測兮江
之毓秀不勝紀兮江之遺蹟可勝憶兮洞有老人
今安適兮館無了翁誰共飲兮拾遺沉溺渺哀怨

眉州屬志

卷十七

賦

五

之不聞兮旌喜院荒恍讀書之有聲兮我思古人
移我情兮俯仰上下不知其一往而深兮

萃龍山賦

并序

彭端淑

赤崕之西盤沱之南長松千株翠柏成行其山曰
萃龍其寺曰紫雲余兄弟讀書其上後成名去奔
走薄宦三十餘年雖簿書鞅掌而寤寐未忘也每
一過之感慨流連不能自已因而作賦其辭曰
維吾祖之好施兮得異僧與周旋愛茲山之奇拔
兮結草廬以爲緣於是鋤茅誅棘通道鑿山鳩工

採木構宇崇巒層樓飛閣高視塵寰蓮臺獅座釋
像森嚴靈區奧府別一洞天夫其風光變幻四時
改妝聽禽音之下上兮瞻百卉之芬芳席林木之
陰翳兮履盛暑而清涼白雲出沒於遠岫兮蘭蕙
吐谷而馨香菲菲兮雪花之飄絮鬱鬱兮松柏之
凌霜羌若攀藤蘿躡高躅俯人間極遠目南瞰峩
眉西眺瓦屋玉案橫呈遐天展燾萬山環拱合沓
如簇錯落崢嶸或起或伏又有瀑布飛泉北下奔
觸曲折成溪逶迤盤谷遊鱗尾尾白石鑿鑿古韻
叶簇

眉州屬志

卷十七 詩

六

清無點塵冷然可掬斯亦遊覽之壯觀也乃若地
處絕域寥寂無隣木石與居麋鹿爲羣猿啼虎嘯
兔走狼奔鷄鳴塞外犬吠雲端古韻
叶敦唯見牧童橫
笛樵夫負薪斯固衣冠之客不至抑亦騷人逸士
之所心慕而無因余偕昆季讀書其上烟靄縈空
嵐霞染嶂皓月臨窻清光宕瀟一咏一歌神怡心
曠蓬島虛無茲焉可尙此景難追每過惆悵嗚呼
情之所鍾不能自己援筆而賦賦罷而起歌曰宇
宙浩浩兮奚役志而疲神人生行樂兮捨此地其

焉尋笑彥倫之逋客兮勞山英之移文余亦安免
於俗士兮思踐約而情牽古韻追南皮之往事兮
悲子桓之懷人流光冉冉其迅速兮彈指焉其四
十春老去不堪回憶兮恍如夢而如醺

詩

唐

戲作花卿歌

杜甫

成都猛將有花卿學語小兒知姓名用如快鶻風
火生見賊唯多身始輕綿州副使著柘黃我卿掃

眉州屬志

卷十七 詩

七

除卽日平子章髑髏血模糊手提擲還崔大夫李
侯重有此節度人道我卿絕世無旣稱絕世無天
子何不喚取守京都

五代

耘田鼓

諷歐陽炯也

僧可朋

農舍田頭鼓王孫筵上鼓擊鼓兮皆爲鼓一何樂
兮一何苦上有烈日下有焦土願我天公降之以
雨令桑麻熟倉箱富不饑不寒上下一般足

中秋玩月

登樓仍喜此宵晴
圓魄纔觀思便清
海面乍浮猶隱映
天心高掛最分明
片雲想有神仙出
迥野應無鬼魅形
曾向洞庭湖上看
君山半霧水初平
雪深偶談載咏蝶
如唐僧可朋
乍當暖景飛仍慢
欲就芳叢舞更高

龍鵠山

杜光庭

抽得閒身伴瘦筇
亂敲青碧喚蛟龍
道人掃逕收松子
缺月初懸天柱峰

李白讀書臺

眉州屬志

卷十七 詩

八

山中猶有讀書臺
風掃晴嵐畫帳開
華月冰壺依舊在
青蓮居士幾時來

宋

木假山

梅堯臣

空山枯楠大蔽牛
霹靂夜落魚鳧洲
魚鳧水射幾千秋
蠹肌爛髓沙蕩流
惟存堅骨蛟龍鏤
形侔三山中雄酋
左右兩峰相挾翼
尊奉君長無慢尤
蘓夫子見之驚且喜
買與溪叟憑貂裘
因嗟大不爲梁棟
又嘆賤不爲薪樵
雨侵蘚澀得石瘦
宜與夫

子歸隱邛

贈蘓明允

客心如萌芽忽與春風動又隨落花飛去作江南
夢我家無梧桐安可久留鳳凰棲在桂林烏哺不
得共無忘桂枝榮舉酒一以送

老人泉

泉上有老人隱見不可常蘓子居其間飲水樂未
央泉中若有魚與子同徜徉歲月不知老家有雛
鳳凰百鳥戢羽翼不敢呈文章去爲仲尼歎出爲

眉州屬志

卷十七 詩

九

盛世翔方今天子聖無滯彼泉旁

輓蘓明允

歐陽修

布衣馳譽入京都丹旆俄驚返舊廬諸老誰能先
賈誼君王猶未識相如三年弟子行喪禮千里鄉
人會塋車我獨空齋掛塵榻遺編時閱子雲書

磐石山石刻

范 鎮

窮幽訪磐石細徑入荒涼踏葉屐履濕觴花衣袂
香

遊三游洞

蘓 洵

洞中蒼石流成乳山下寒溪冷欲冰天寒二子苦
求去我欲居之亦不能

水官詩

水官騎蒼龍龍行欲上天手攀時且住浩若乘風
船不知幾何長足尾猶在淵下有二從臣左右乘
魚鼃矍鑠相顧視風舉衣袂翻女子侍君側白頰
垂雙鬢手執雉尾扇容如未開蓮從者八九人非
鬼非戎蠻出水未成列先登揚旗旃長刀擁旁牌
白羽注強弩雖服甲與裳狀貌猶鯨鱣水獸不得

眉州屬志

卷十七 詩

十

從仰面以手扳空虛走雷霆雨雹晦九川風師黑
虎囊面目昏塵烟缺 三神人萬里朝天關我從

大覺師得此詭怪編畫者古闔子於今三百年見
者誰不愛予者誠已難在我猶在子此理寧非禪
報之以好詞何必畫在前

寄黎眉州

蘇軾

膠州高處望西川應在孤雲落照邊瓦屋寒堆春
後雪峩眉翠掃雨餘天治經方笑春秋學好事今
無六一賢且待淵明賦歸去共將詩酒趁流年

董儲郎中嘗知眉州與先人遊過安邛訪其故
居見其子希甫留詩屋壁

白髮郎潛舊使君至今人道最能文
隻鷄敢忘橋公語下馬來尋董相墳
冬月負薪雖一作那得免鄰

人吹笛不堪聞死生契濶君休問
灑淚西南向白雲

書劉君射堂

集本云劉乙新作射堂
公自注乙父嘗知眉州

蘭玉當年刺史家雙韃馳射笑穿花
而今白首閑驄馬只有清樽照畫蛇
寂寂小軒蛛網遍陰陰垂

眉州屬志

卷十七 詩

十一

柳鴈行斜手柔弓燥春風後置酒看君中
戟牙

送賈訥倅眉山

當年入蜀嘆空回未見峩眉肯再來
童子遙知頌襦袴使君先已洗樽壘
自注李大夫賢守也鹿頭北望應
逢鴈人日東郊尙有梅
自注人日出東郊渡江
游驀頤山眉之故事也我
老不堪歌樂職後生試覓子淵才

老翁山下玉淵回手植青松三萬栽
父老得書知我在蓬蒿親手爲君開
試看一一龍蛇舞更聽蕭蕭風雨哀
便與甘棠同不剪蒼髯白甲待歸來
自注

云先君葬於驀頤山之東二十餘里地名老翁泉君許爲一徃感嘆之深故反之

老翁井

井中老翁悞年華白沙翠石公之家公來無蹤去
無迹井面團圓水生花翁今與世兩何與無事紛
紛驚牧豎改顏易服與世同無使世人知有翁

木山

并引

吾先君子嘗蓄木山三峰且爲之記與詩詩
人梅二丈聖俞見而賦之今三十年矣而猶
子千乘又得五峰益竒因次聖俞韻使并刻

眉州屬志

卷十七 詩

十二

之其側

木生不願回萬牛願終天年仆沙洲時來幸逢河
伯秋掀然見怪推不流蓬婆雪領巧彫鏤蟄蟲行
蟻爲豪酋阿咸大膽忽持去河伯好事不汝尤城
中古沼浸坤軸一林瘦竹吾菟裘二頃良田不難
買三年椋木行可櫛會將白髮對蒼巘魯人不厭
東家邛

異鵲

昔我先君子仁孝行於家家有五畝園么鳳集桐

花是時鳥與鵲巢穀可俯拏憶我與諸兒飼食觀
羣呀里人驚瑞異野老笑而嗟云此方乳哺甚畏
鳶與蛇手足之所及二物不敢加主人若可信衆
鳥不我遐故知中孚化可及魚與鰕柯侯古循吏
悃愾眞無華臨漳所全活數等江千沙仁心格異
族兩鵲栖其衙但憾不能言相對空楂楂善惡以
類應古語良非誇君看彼酷吏所至號鬼車

次韻水官詩 并引

淨因大覺璉師以閩立本畫水官遺編禮公

眉州屬志

卷十七 詩

十三

公旣報之以詩謂某汝亦作某頓首再拜次
韻仍錄二詩爲一卷以獻

高人豈學畫用筆乃其天譬如善游人一一能操
船閩子本逢掖疇昔慕雲淵丹青偶爲戲染指初
嘗寵愛之不自己筆勢如風翻傳聞正觀中左衽
解椎鬟南夷羞白雉佛國貢青蓮詔令擬王會別
殿寫戎蠻熊冠金絡額豹袖擁旛旛傳入應門內
俯伏脫劔卷天姿儼龍鳳雜沓朝鵬鱣神功與絕
跡後世兩莫扳自從李氏亡羣盜竊山川長安三

日火至寶隨飛烟尙有脫身者漂流出東關三官
豈容獨得此今已編吁嗟至神物會合當有年京
城諸權貴欲取百計難贈以玉如意豈能動高禪
信應一篇詩皎若畫在前

罷徐州往南京馬上走筆寄子由其五

卜田向何許石佛山南路下有爾家川千畦種杭
稔山泉宅龍蜃平地走膏乳異時畝一金近欲爲
逃戶逝將解簪紱賣劍買牛具故山豈不懷廢宅
生蒿穰便恐桐鄉人長祠仲卿墓王注石佛山在眉
州眉山縣之南

眉州屬志

卷十七 詩

十四

和子由踏青

子由踏青詩序眉之東門十數里
有山曰墓頤山上有亭榭松竹山

下臨大江每正月人日士女相與
遊嬉飲酒於其上謂之踏青也

春風陌上驚微塵游人初樂歲華新人間正好路
傍飲麥短未怕游車輪城中居人厭城郭喧闐曉
出空四鄰歌鼓驚山草木動簞瓢散野烏鳶馴何
人聚衆稱道人遮道賣符色怒嗔宜蠶使汝蠶如
甕宜畜使汝羊如麇路人未必信此語強爲買服
襪新春道人得錢徑沽酒醉倒自謂吾符神

和子由蠶市

子由詩序眉之二月望日蠶市
於市因作樂縱觀謂之蠶市

蜀人衣食常苦艱蜀人遊樂不知還千人耕種萬人食一年辛苦一春閒閒時尙以蠶爲市共忘辛苦逐欣歡去年霜降斫秋荻今年箔積如連山破瓢爲輪土爲釜爭買不翅金與紈憶昔與子皆童卯年年廢書走市觀市人爭誇鬥巧智野人啞啞遭欺謾詩來使我感舊事不悲去國悲流年

子由將赴南部與予會於逍遙堂作兩絕句讀之殆不可爲懷因和其詩以自解

別期漸近不堪聞風雨蕭蕭已斷魂猶勝相逢不

眉州屬志

卷十七 詩

十五

相識形容變盡語音存

但令朱雀長金花此別還同一轉車五百年間誰復在會看銅狄兩咨嗟

次韻表兄程正輔江行見桃花

公母成國太夫人程氏眉山著

姓其姪之才字正輔第二之元字德孺第六卽楚州第七之邵字懿叔

曲士賦懷沙草木傷莽莽德人無荆棘坐失嶺嶠阻我兄瑚璉姿流落瘴江浦浮眼見桃花紛紛墮紅雨蕭然振衣袂笑問散花女我觀解語花粉色如黃土一言破千偈况爾初不語可憐一轉話他

日如何舉故復此微吟聊和鷗鴉櫓江邊閒草木
閑客當爲主爾來子美瘦正坐作詩苦袖手焚筆
硯清篇眞漫與願君一作兄理北轅六轡去如組上
林桃花開水煖鴻北翥

表弟程德孺生日名之元行二

仗下千官散紫庭微聞偶語說蘓程長身自昔傳

甥舅壽骨遙知是弟兄公自注予與君皆壽骨貫耳班列中多指予二人不

問而知其爲中表也曾活萬人寧望報祇求五畝卻歸耕四

朝遺老凋零盡鶴髮他年幾箇迎

眉州屬志

卷十七 詩

十六

送表弟程六知楚州

炯炯明珠照雙壁當年三老蘓程石里人下道避
鳩杖刺史迎門倒鳧舄我時與子皆兒童狂走從
人覓梨栗健如黃犢不可恃隙過白駒那暇惜醴
泉寺古垂橘柚石頭山高暗松櫟諸孫相逢萬里
外一笑未解千憂集子方得郡古山陽老手生風
謝刀筆我正含毫紫微閣病眼昏花困書檄莫教
印綬繫餘年去掃墳墓當有日功成頭白早歸來
共藉梨花作寒食

送程七表弟知泗州

江湖不在眼塵土坐滿顏繫舟清洛尾初見淮南
山淮山相媚好曉鏡開烟鬢持此娛使君一笑簿
領間使君如天馬朝燕暮荆蠻時無王良手空老
十二閑聊當出毫末化服狡與頑勿謂無人知古
佛臨濤灣赤子視萬類流萍閱人寰但使此可人
餘事眞茅菅

次京師韻送表弟程懿叔赴夔州運判

與子甥舊氏摧頽各蒼顏竝爲東諸侯長此佳江

眉州屬志

卷十七 詩

十七

山寒松無時花安得插髻鬢惟將老不死一笑榮
枯閒我甚似樂天但無素與蠻挂冠及未耄當獲
一紀閑子亦拙進取才高命堅頑譬如萬斛舟行
此九折灣仲氏新得道一漚目塵寰歲晚家鄉路
莫遣生榛菅

仲天貺王元直自眉山來見余錢塘留半歲旣

行作絕句五首送之

王箴字元直公夫
人同安君之弟也

仲君豈弟多學王子清修寡言病後空驚鶴瘦時
來或作鵬鷺

海角煩君遠訪江源與我同來剩作數詩相送莫教萬里空回

三人一旦同行留下高齋月明遙想扁舟京口尙餘孤枕潮聲

更欲留君久住念君去國彌年空使犀顱玉頰長懷髯舅淒然

爲余遠致殷勤瑞草橋邊老人紅帶雅宜華髮白醪光泛新春

送任伋通判黃州兼寄其兄孜

眉州屬志

卷十七 詩

十八

吾州之豪任公子少年盛壯日千里無媒自進誰識之有才不用今老矣別來十年學不厭讀破萬卷詩愈美黃州小郡夾溪谷茆屋數家依竹葦知命無憂子何病見賢不薦當誰耻平原老令更可悲六十青衫貧欲死桐鄉遺老至今泣潁川大姓誰能箠因君寄聲問消息莫對黃鷄矜爪觜

答任師中次韻

閒裏有深趣常憂兒輩知已成歸蜀計誰借買山貲世事久已謝故人猶見思平生不飲酒對子敢

論詩

答任師中家漢公

先君昔未仕杜門皇祐初道德無貧賤風采照鄉閭
何嘗疎小人小人自闊疎出門無所詣老史在郊墟
門前萬竿竹堂上四庫書高樹紅消梨小池白芙蕖
常呼赤脚婢雨中擷園蔬矯矯任夫子罷官還舊廬
是時里中兒始識長者車烹雞酌白酒相對歡有餘
有如龐德公往還葛與徐妻子走堂下主人竟誰歟
我時年尙幼作賦慕相如侍立看

眉州屬志

卷十七 詩

十九

君談精悍實起予歲月曾幾何耆老逝不居史侯
最先沒孤墳拱桑樗我亦涉萬里清血滿襟袪漂
流二十年始悟萬緣虛獨喜任夫子老佩刺史魚
威行烏白蠻解辯請冠裾方當入奏事清廟陳璠
璵胡爲厭軒冕歸意不少紓上蔡有良田黃沙走
清渠罷亞百頃稻雍容十年儲閒隨李丞相搏射
鹿與豬蒼鷹十斤重猛犬如黃驢豈比陶淵明窮
苦自把鋤我今四十二衰髮不滿梳彭城古名郡
乏人偶見除頭顱已可知幾何不樵漁會當相從

去芒鞋老菑畚念子瘴江邊懷抱向誰攄賴我同
年友相歡出同輿冰盤薦文鮪玉笋傾浮蛆醉中
忽思我清詩綴瓊琚知我少談一作所諧教我時卷
舒世事日反覆翩如風中旃雀羅弔廷尉秋扇悲
婕妤升沉一何速喜怒紛衆狙作詩謝二子我師
甯與遽

京師哭任遵聖

名孜

十年不還鄉兒女日夜長豈惟催老大漸復成凋
喪每聞耆舊亡涕泫聲輒放老任况竒逸先子推

眉州屬志

卷十七 詩

二十

輩行文章得少譽詩語尤清壯吏能復所長談笑
萬夫上自喜作劇縣偏工破豪黨奮髯走滑吏嚼
齒對姦將哀哉命不偶每以才得謗竟使落窮山
青衫就黃壤宦遊久不樂江海永相望退耕本就
君時節相勞餉此懷今不遂歸見纍纍哭望國
西門落日銜千嶂平生惟一子抱負珠在掌見之
齟齬中已有食牛量他年如入洛生死一相訪惟
有王濬冲心知中散狀

任師中挽辭

名伋

大任剛烈世無有疾惡如風朱伯厚小任溫毅老
更文聰明慈愛小馮君兩人才行不須說疇昔竝
友吾先人相看半作晨星沒可憐太白與殘月大
任先去冢未乾小任相繼呼不還強寄一樽生死
別樽中有淚酒應酸貴賤賢愚同盡耳君家不盡
緣賢子人間得喪了無憑只有天公終可倚

閱世堂詩贈任仲微

任仲微師
中之子

任公鎮西南嘗贈繞朝策當時若盡用善陣無赫
赫淒涼十年後邪正久已白卻留封德彝天意眇

眉州屬志

卷十七 詩

二十一

難測象賢眞驥種號訴甘百謫豈云報私仇禍福
指絡胍高才食舊德但恐里門窄傷心千騎歸贈
印黃壤隔惟有庭前檜閱世不改色千年與井在
記此王粲宅

送程建用

字彝仲眉山人

先生本舌耕文字浩千頃空倉付公子坐待發蒼
穎十年困新說兒女爭捕影鑿垣種蒿蓬嘉穀誰
復省空餘南陔意太息北堂冷織履隨方進採薪
教韋逞辛勤守一經菽水賢五鼎今年聞起廢魯

史復光景公子亦改官三就繁馬頸歸來一笑粲
素髮颯垂領會看金花詔湯沐奉朝請天公不吾
欺壽與龜鶴永

陳季常見過三首

季常名慥父希亮字公弼其先自京兆遷於眉

仕宦常畏人退居還喜客君來輒館我未覺雞黍
窄東坡有竒事已種十畝麥但得君眼青不辭奴
飯白

送君四十里只使一帆風江邊千樹柳落我酒杯
中此行非遠別此樂固無窮但願長如此來往一

眉州屬志

卷十七 詩

二十二

生同

聞君開龜軒東楹俯喬木人言君畏事欲作龜頭
縮我知君不然朝飯仰暘谷餘光幸分我不死安
可獨

大寒步至東坡贈巢三

巢三名山谷字元修眉山山人

春雨如暗塵春風吹倒人東坡數間屋巢子誰與
隣空牀斂敗絮破竈鬱生薪相對不言寒哀哉知
我貧我有一瓢酒獨飲良不仁未能頰我頰聊復
濡子唇故人千鐘祿馭吏醉吐茵那知我與子坐

作寒螿呻努力莫怨天我爾皆天民行看花柳動
共享無邊春

元修菜 並引

菜之美者有吾鄉之巢故人巢元修嗜之余
亦嗜之元修云使孔北海見當復云吾家菜
耶因謂之元修菜余去鄉十有五年思而不
可得元修適自蜀來見余於黃乃作是詩使
歸致其子而種之東坡之下云

彼美君家菜鋪田綠茸茸豆莢圓且小槐牙細而

眉州屬志

卷十七 詩

二十三

豐種之秋雨餘擢秀繁霜中欲花而未萼一一如
青蟲是時青羣女採擷何聰聰烝之復湘之香色
蔚其饒點酒下鹽豉縷橙芼薑葱那知雞與豚但
恐放箸空春盡苗葉老耕翻烟雨叢潤隨甘澤化
暖作青泥融始終不我負力與糞壤同我老忘家
舍楚音變兒童此物獨嫵媚終年繫余曾君歸致
其子囊盛勿函封張騫移苜蓿適用如葵菘馬援
載薏苡羅生等蒿蓬懸知東坡下墾鹵化千鐘長
使齊安民指此說兩翁

次韻子由送家退翁知懷安軍

家退翁名安定國弟復禮名安國

東坡子由及退翁兄弟少時皆從眉州劉微之

吾州同年友粲若琴上星當時功名意豈止拾紫
青事既喜違願天或不假齡今如圖中鶴俛仰在
一庭退翁守清約霜菊有餘馨鼓笛方入破朱絃
微莫聽西南正春早廢沼黏枯萍翩然一麾去想
見靈雨零我無謫仙句待詔沉香亭空騎內廐馬
天仗隨雲駟竟無絲毫補眷焉誰汝令永愧舊山
叟憑君寄丁寧

眉州屬志

卷十七

詩

二十四

送家安國教授歸成都

家安國字復禮眉山人也

別君二十載坐失兩鬢青吾道雖艱難斯文終典
刑屢作退飛鷁羞看乾死螢一落戎馬間五見霜
葉零夜談空說劍春夢猶橫經新科復舊貫童子
方乞靈須煩凌雲手去作入蜀星蒼苔高聯室古
柏文翁庭初聞編簡香稍覺鋒鏑腥岷峩有雛鳳
梧竹養修翎嗚呼應嶰律飛舞集虞廷吾儕便歸
老亦足慰餘齡

慶源宣義王丈以累舉得官爲洪雅主簿雅州

戶掾遇吏民如家人人安樂之既謝事居眉之
青神瑞草橋放懷自得有書來求紅帶既以遺
之且作詩爲戲請黃魯直秦少游各爲賦一首
爲老人光華

青衫半作霜葉枯遇民如兒吏如奴吏民莫作官
長看我是識字耕田夫妻啼兒號刺史怒時有野
人來挽須拂衣自注下下考芋魁飯豆吾豈無歸
來瑞草橋邊路獨遊還佩平生壺慈姥巖前自喚
渡青衣江畔人爭扶今年蠶市數州集中有遺民

眉州屬志

卷十七 詩

二十五

懷袴襦邑中之黔相指似白髮紅帶老不癯我欲
西歸卜鄰舍隔牆拊掌容歌呼不學山王乘駟馬
回頭空指黃公壚

寄蔡子華蔡子華名褒
眉之青神人

故人送我東來時手栽荔子待君歸荔子已丹吾
髮白猶作江南未歸客江南春盡水如天腸斷西
湖春水船想見青衣江畔路白魚紫笋不論錢霜
鬢三老如霜檜舊交零落今誰輩莫從唐舉問封
侯但遣麻姑更爬背

送戴蒙赴成都玉局觀歸老

拾遺被酒行歌處野梅官柳西郊路聞道華陽版
籍中至今尙有城南杜我欲歸尋萬里橋水花風
葉暮蕭蕭芋魁徑尺誰能盡檜木三年已足燒百
歲風狂定何有羨君今作峩眉叟縱未家生執戟
郎也應世出埋輪守莫欺老病未歸身玉局他年
第幾人會待子猷清興發還須雪夜去尋君

朝陽峯東閣

月落星稀露氣香煙消日出曉光涼天東扶木三

眉州屬志

卷十七 詩

二十六

千丈一片丹心似許長

遊三游洞

蘓轍

昔年有遷客攜手過嵌巖去我歲已百游人忽復
三

人日遊驀頤

江上冰消岸草青三三五五踏青行浮橋沒水不
勝重野店壓糟無復清松下寒花初破萼谷中幽
鳥漸嚶鳴洞中泉脉龍眼動觀裏丹墀鴨舌生
山下餅壘霑稚孺峯頭鼓樂聚簪纓縞裙紅袂臨

江影青蓋驂騮踏石聲曉去心先爭蕩漾暮歸跨
後醉縱橫最憐人散兩軒靜曖曖斜陽著樹明

逍遙堂詩

有序

轍幼從子瞻讀書未嘗一日相舍既壯將遊
宦四方讀韋蘓州詩那知風雨夜復此對床
眠惻然感之乃相約早退爲閑居之樂故子
瞻始爲鳳翔幕留詩爲別曰夜雨何時聽蕭
瑟其後子瞻通守餘杭復移守膠西而轍滯
留於淮陽濟南不見者七年熙寧十年二月

眉州屬志

卷十七 詩

二十七

始會於澶濮之間相從彭城百餘日時宿於逍
遙堂退感前約爲作二小詩

逍遙堂後千尋木長送中宵風雨聲誤喜對床尋
舊約不知漂泊在彭城

秋來東閣涼如水客至山公醉似泥困卧北牕呼
不醒風吹松竹雨淒淒

子瞻詩句妙一時乃云效庭堅體盖退之戲效
孟郊樊宗師之比以文滑稽耳恐後生不解故
以韻道之

黃庭堅

我詩如曹檜淺陋不成邦公如大國楚吞五湖三
江赤壁風月笛玉堂雲霧窻句法堤一律堅城受
我降枯松倒澗壑波濤所春撞萬牛挽不前公乃
獨力扛諸人方嗤點渠非晁張雙但懷相識察牀
下拜老龐小兒未可知客或許敦龐誠堪壻阿巽
買紅纏酒缸

贈蘓子瞻二首

江梅有佳實託根桃李場桃李終不言朝露借恩
光孤芳忌皎潔冰雪空自香古來和鼎實此物升

眉州屬志

卷十七 詩

二十八

廟廊歲月坐成晚煙雨青已黃得升桃李盤以遠
初見嘗終然不可口擲棄官道傍但使本根在棄
捐果何傷

青松出洞壑十里聞風聲上有百尺絲下有千歲
苓小草有遠志相依在平生醫和不並世深根且
固蒂人言可醫國何用太早計小大才則殊氣味
固相似

跋子瞻和陶詩

子瞻謫嶺南時宰欲殺之飽喫惠州飯細和淵明

詩彭澤千載人東坡百世士出處雖不同風味乃相似

次韻子瞻題郭熙畫秋山

黃州逐客未賜環江南江北飽看山玉堂卧對郭熙畫發興已在青林間郭熙官畫但荒遠短低曲折開秋晚江村煙外雨脚明歸鴈行邊餘疊巘坐思黃甘洞庭霜憾身不如鴈隨陽熙今頭白有眼力尙能弄筆映窻光畫取江南好風日慰此將老鏡中髮但熙肯畫寬作程五日十日一水石

眉州屬志

卷十七 詩

二十九

次韻子瞻和子由觀韓幹馬因論伯時畫天馬于闐花驄龍八尺看雲不受絡頭絲西河驄作葡萄錦雙瞳夾鏡耳卓錐長楸落日試天步知有四極無由馳電行山立氣深穩可耐珠韉白玉羈李侯一顧歎絕足領畧古法生新奇一日眞龍入圖畫在垆羣雄望風雌曹霸弟子沙苑丞喜作肥馬人笑之李侯論幹獨不爾妙盡骨相遺毛皮翰林評書乃如此賤肥貴瘦渠未知况我平生賞神俊僧中云是道林師

雙井茶送子瞻

人間風月不到處天上玉堂森寶書想見東坡老
居士揮毫百斛瀉明珠我家江南摘雲腴落磴霏
霏雪不如爲公喚起黃州夢獨載扁舟泛五湖

次韻子瞻寄眉山王宣義

叅軍但有四立壁初無臨江千木奴白頭不是折
腰具桐帽棕鞵稱老夫滄江鷗鷺野心性陰壑虎
豹雄牙須鸚鵡作裘初服在猩血染帶鄰翁無昨
來杜鵑勸歸去更得把酒聽提壺當今人才不之

眉州屬志

卷十七 詩

三十

使天上二老須人扶兒無飽飯尙勤書婦無複禪
且著襦社甕可漉溪可漁更問黃雞肥與癯林間
醉著人伐木猶夢官下聞追呼萬釘圍腰莫愛渠
富貴安能潤黃壚

湖口人李正臣蓄異石九峯東坡先生名曰壺
中九華并爲作詩後八年自海外歸過湖口石
已爲好事者所取乃和前篇以爲笑實建中靖
國元年四月十六日明年當崇寧之元五月二
十日庭堅繫舟湖口李正臣持此詩來石旣不

可復見東坡亦下世矣感嘆不足因次前韻
有人半夜持山去頓覺浮嵐暝翠空試問安排華
屋處何如零落亂雲中能迴趙璧人何在已入南
柯夢不通賴有霜鐘難席卷袖椎來聽響玲瓏

追和東坡題李亮功歸來圖

今人常憾古人少今得見之誰謂無欲學淵明歸
作賦先煩摩詰畫成圖小池已築魚千里隙地仍
栽芋百區朝市山林俱有累不居京洛不江湖

次韻子瞻春菜

眉州屬志

卷十七 詩

三十一

北方春蔬嚼冰雪妍暝思采南山蕨韭苗水餅姑
置之苦菜黃雞羹糝滑蓴絲色紫菰首白萁蒿牙
甜焯頭辣生菹入湯翻手成芼以薑橙誇縷抹驚
雷茵子出萬釘白鵝截掌鼈解甲琅玕林深未飄
籜軟吹香秔煨短茁萬錢自是宰相事一飯且從
吾黨說公如端爲苦笋歸明日青衫誠可脫

再和寄子瞻聞得湖州

天下無相知得一已當半桃僵李爲仆芝焚蕙增
嘆佳人在江湖照影自娛玩一朝入漢宮掃除備

冗散何如終流落長作朝雲伴相思欲面論坐起
鷄五旦身慚尸廩祿有罪未見案公又雄萬夫皦
皦不自亂臧穀皆亡羊要以道湔盥傳聲向東南
五事不可緩春波下數州快若七札貫椎鼓張風
帆相見激衰懦空文不傳心千古付煨炭安得垂
天雲飛就吳興館魚鱣柳絮肥筍煮溪沙暖解歌
使君詞樽前有三粲

聞東坡貶惠州

唐庚

元氣脫形數運動天地內東坡未離人豈比元氣

眉州屬志

卷十七 詩

三十二

大天地不能容伸舒輒有碍低頭不得仰閉口焉
敢效東坡坦率老局促困難耐何當與道俱逍遙
天地外

送鄉人下第還鄉

閉戶誦詩史已讀萬卷破養氣塞天地不受一毫
挫聲名落空廓踪跡長坎坷塵埃相邂逅齒髮嗟
老大文章心未死功業手猶唾世事若循環天理
猶轉磨朝得暮或失俯弔仰輒賀行見風雲會驚
起南陽卧

到任復寄家兄

君子所就三惟食爲最下起家仰寸祿此實下焉
者南山無敝廬千里就官舍但使食有餘敢言曹
乏馬同寮皆故人每事相借假况復官長賢醉歸
應不罵

風樹吟

子路有言樹欲靜而風不止子欲養而親不
待予三復而悲之故作風樹吟以終其意

樹欲靜兮風不止子欲養兮親不待歸飛反哺八

眉州屬志

卷十七 詩

三十三

九子我曾不如畢逋尾樹欲靜兮風不休子欲養
兮親不留且自梅兮暮至棘當年飼我如鳴鳩

劍州道中見桃李盛開而梅花猶有存者時張商英

被召以此投
之大見稱賞

桃花能紅李能白春深無處無顏色不應尙有數
枝梅可是東君苦留客向來開處當嚴冬桃李未
在交遊中卽今已是丈人行肯與少年爭春風

題洪川驛邑西南三十里

倦遊征人髮欲絲膏車秣馬東西馳出門四顧述

路岐閉戶却坐愁支頤魚生釜竈鼠巢枝爾畦千
里城陂池吾皇致治方無爲淫雨破塊天何知勸
君飲酒君勿疑行使止尼良由時未逃形數皆有
涯此獨未信無窮期

受代還眉

久客念吾土每嘆江山非及茲受代去亦復無家
歸仕宦幾半世奔走遍九圍竟無置錫土安此容
膝扉還當僦屋居况有囊金揮處鄉亦何有去國
空依依

眉州屬志

卷十七 詩

三十四

病鶴行

鶴兮鶴兮何處來秋江靜兮蘆花開波浪侵月白
皚皚千聲萬聲鳴哀哀不飛不翔不飲啄骨瘠稜
稜瘦如削冰姿玉質僅生存雪羽霜毛半零落鶴
兮何鬱鬱我知爾是冲天物芝田養就孤高情瑤
池洗出神仙骨傳聞仙島冥冥中水晶甃作蓬萊
宮祥烟瑞露常濛濛好將六翮搏天風

清明日示弟姪

歲華忽忽又清明憶與諸生試集英金鎖掣雷開

右掖紵欄披雪照升平立班雉尾身疑夢茂對龍
顏目乍驚百拜起居分左右十年胸臆展縱橫愧
無長策裨千慮敢昧初心苟一名三道豈能窺董
傅乙科今復愧匡衡始吾進取恬無意看汝光華
便是榮他日當求田二頃杖藜自足過浮生

醉眠

山靜似太古日長如小年餘花猶可醉好鳥不妨
眠世味門常掩時光篋已便夢中頻得句拈筆又
忘筌

眉州屬志

卷十七 詩

三十五

人日

人日傷心極天時觸目新殘梅詩興晚細草夢魂
春挑菜年年俗飛蓬處處身墓頤頻語及髣髴到
東津

夜坐懷舍弟

無雲仍露坐有月更江臯沉陸傷吾道浮生憶爾
曹扁舟應夏口此夕數秋毫不見今三載當時已
二毛

春日謫居書事

四十緇成素清明綠勝紅形容千慮後門館一貧
中白日時時別青蕪處處同此生唇舌裏啼鳥暮
春風

送外甥之廣州

田也久從我牢之真有甥時情爲客老秋色進船
清撥刺朝朝味鈎轉處處聲越臺休弔古旅魄向
來驚

九日獨酌

登高無老伴引滿自高歌歡意天邊少垂楊野外

眉州屬志

卷十七 詩

三十六

多黃花空歲月白首尙關河他日龍山興吾今在
網羅

書齋卽事

書生不事事書齋春晝長竹色語笑綠松風意思
涼簟瓢樂仁義圖史披興亡此間有佳趣此外皆
茫茫

春歸

東風定何物所至輒蒼然小市花間合孤城柳外
圓禽聲犯寒食江色帶新年無計驅愁得還推到

酒邊

寓精道齋有感懷穴山

論兵作賦兩忽忽人事光陰轉手空五一作半夜夢

飛山色裏一年秋在雨聲中揚州騎鶴非無意上

蔡牽黃信此窮幸有林泉未歸去欲將情興問征

鴻

次張天覺見贈韻

別公歸去養天和見說清朝士已多裾捨登門何
處曳頂緣受記昔曾摩幾時傳說重調鼎去歲成

眉州屬志

卷十七 詩

三十七

湯已解羅會引鑑湖爲故事要從英主乞三峩

南遷

去去寬鄉託此蹤鬧中無地頓衰翁未除綺語猶
輕典更賜羅浮有此功蝦菜賤時皆丙穴茅柴美
處卽郵筒着鞭要及春前到趁賦梅花庾嶺東

哀詞

雲霄才業逝山東學易年齡一夢中春殿昔抽蟾
桂綠夜臺今隕幕蓮紅殘章斷稿塵埃滿別院疎
簾笑語空千古龜山原口墓暝因蕭索白楊風

赴益昌

豈有登臺袞袞謾令去國遲遲南越纓方欲請北
山文莫相移

題瀘州城樓 一云餘甘渡

百舫黃鱸鱠玉萬戶赤酒澆霞餘甘渡頭客艇荔
枝林下人家

春日襍興 四首

羲陽瀟洒燕臺詩誰解知音似柳枝寂寂閒庭春
色過露花無語背人垂

眉州屬志

卷十七 詩

三十八

短帽輕衫信馬行郊原春色太牽情兔葵燕麥渾
閒事最有蕪菁到處生

月團新碾破春醒賴有歸鴻寄好音人在天涯莫
回首恐偷華髮上瑤簪

故人不見空凝睇過眼全踈只斷魂猶有野梅臨
水在一枝無語伴黃昏

甲午元日

非賢幸脫龍蛇歲上聖應憐蟣虱臣憶與政和同
度嶺來朝已點四年春

渡沔

鶴歸遼海悲人世猿入巴山叫月明惟有沙蟲今
好在往來休並水邊行

從何使君臣父子遊墨池分韻

得名字

李燾

蜀學擅天下王馬先得名簧如巧言語於道盖小
成子雲最後出振策見遐征斯文大一統歟使聖
域清富貴盡在我紱冕非所榮旁皇天祿閣聊亦
觀我生懷哉不能歸舊宅荒榛荆寂寞竟誰顧正

眉州屬志

卷十七 詩

三十九

路今莫行使君蓬萊仙盼節歸赤城門無俗賓客
家有賢父兄慨念此耆老不登漢公卿臨池一樽
酒尙友千載英拜呼嚴與李月旦共細評區區可
無憾彼重適我輕竭來成都市塵土污冠纓古人
不可見見此眼自明請爲懷古詩玉振而金聲

龍鵠山

西山有佳人慣踏山下路晨吟澤畔風午睡巖前
雨莫使兒輩覺損我巖壑趣

雁湖梅花

鏡面千頃潤修眉一帶橫湖深有龍蟄山靜少人
行似與長仙約都忘世俗情鳥啼猿叫歇軒樂有
餘清

成都學舍遣興二首

久客墮塵土幽居懷翠微只餘清夜夢長作故山
歸菊已開三徑松應長十圍晨鍾忽驚覺猶有露
沾衣

其二

壯矣府中縣索如城外村墨池今掃迹石筍舊除

眉州屬志

卷十七 詩

四十

根風急漢絃斷雨多秦鏡昏新秋一懷古情緒若
爲論

題南部停雲巖

路轉層岡二里餘武陵傳者亦難如昔年煉藥仙
人室今日餐霞道士居洞外蟠桃開錦繡巖前丹
溜漱瓊琚猗與靈氣爲時雨可惜圖經缺不書

龍鵠山房

已作清時鳥亂飛杜鵑更勸阿誰歸似嫌住處猶
城郭不解攜家隱翠微

觀音寺

丹邑令 馮時行

人日訪山寺春風能借溫柳深通一徑松暗隱重
門泉竇來何處梅花別有村從容尋舊約假榻卧
雲根

中巖

四川制置使 范成大

赤巖倚竚潺翠邏森成削岑蔚嵐氣重稀間暑光
薄聊尋大士處住叩洞門鑰雙撐紫玉關中矗翠
雲幄應供華藏海歸坐寶樓閣無法可示人但見
雨花落不知龍湫勝何似魚潭樂夜深山四來人

眉州屬志

卷十七 詩

四十一

靜天一握驚看松桂白月影到林壑門前六月江
世界塵漠漠寶瓶有甘露一滴洗煩濁捫天援斗
杓請爲諸君酌

慈姥巖與送客酌別風雨大至涼甚諸賢用中
巖韻各賦餞行詩紛然擘牋清飲終日雖無絲
竹管絃而情咏有餘

山靈知我壓塵土喚起蟄雷塵午暑松風無力雨
絲長散作穆穆雪塵舞巖前懸溜珠簾傾安得吹
來添玉觥詩成酒盡腸亦斷休喚佳人唱渭城

慈姥巖酌別次陸務觀韻

送我彌旬未忍回可憐蕭索把離杯不辭更宿中
巖下投老餘年豈再來

明朝真是送人行從此關山隔故情道義不磨雙
鯉在蜀江流水貫吳城

再次韻答劉文潛司業

平羌江上首空回慈姥巖前定把杯縱使石腸都
忘卻也應風雨送愁來

回廊月下短歌行惟有知音解有情一曲紅窻聲

眉州屬志

卷十七 詩

四十二

裏怨如今分作兩愁城

訪青神尉署借景亭蓋山谷先生舊遊也

四川制置叅議

陸游

造朝下白帝懷古遊青神城頭三間屋聊得岸我
巾元祐太史公世寧有斯人瘴烟侵玉骨老作宜
州民至今杖履地來者猶酸辛密竹剪已空喬木
亦半薪陂池獨渺然中有鷗鷺馴人生能自足一
尉可終身三歎下城去揆梅春江津

晚泊慈姥巖下二首

慈姥磯頭月纖纖照酒杯素秋風露重久客鬢毛
催宿鳥驚還定飛螢闔復開平生四方志老去轉
悠哉

山斷峭崖立江空翠靄生漫多來徃客不盡古今
情月碎知流急風高覺笛清兒曹笑老子不睡待
潮平

玻璃江

眉州共飲亭蓋取東坡共飲玻璃江之句追懷舊遊戲作以補西州樂府

玻璃江水千尺深不如江上離人心君行未過青
衣縣妾心先到峩眉陰金罇共酌不知曉月落煙

眉州屬志

卷十七 詩

四十三

渚天橫參車輪無角那得住馬蹄不方何處尋空
憑尺素寄幽憾縱有綠綺誰知音愁來只欲掩屏

睡無奈夢斷聞疎碓

古樂府安得雙車輪一夜生四角唐人詩云長安塵土中

馬蹄圓重郎馬蹄不方何處認郎踪

木假山

枯楠千歲遭風雷披根折幹吁可哀輪囷無用天
所赦秋水初落浮江來嵌空宛轉若耳鼻峭瘦拔
起何崔嵬珠宮貝闕留不得忽出洲渚知誰推書
窻正對雲洞啓叢菊初傍幽篁栽是間著汝頗宜

稱摩挲朝暮眞千回天公解事雨十日洗盡泥滓
滋莓苔一邛一壑吾所許不須更慕明堂材

眉州郡燕大醉中間道馳出城宿石佛院

玻璃春作江水清紫玉簫如雛鳳鳴漏聲不聞看
爇燭俠氣未減欺飛觥單車萬里信有數二年三
過寧忘情釵頭玉茗妙天下

坐上見白山
茶格韻高絕

瓊花一

樹眞虛名酒酣忽作檀公策間道絕出東關城清
歌未斷去已遠回首樓堞空崢嶸貂裘狐帽醉走
馬陌上應有行人驚徑投野寺睡正美魚鼓忽報

眉州屬志

卷十七 詩

四十四

江天明

醉中懷眉山舊遊

勁酒少和氣哀歌無歡情故鄉不敢思登高望錦
城錦城那得去髣髴墓頤路遙知尊前人指我題
詩處我雖流落夜郎天遇酒能狂似少年想見東
郊攜手日海棠如雪柳飛綿

漢嘉術者袁牧童謂
予明年春分後當還

州西

眉州披風榭拜東坡先生遺像

蜿蜒回顧山有情平鋪十里江無聲孕竒蓄秀當

此地鬱然千載詩書城高臺老仙誰所寫仰視眉
宇寒崢嶸百年醉魂吹不醒飄飄風袖筇枝橫爾
來逢迎厭俗子龍章鳳姿我眼明北扉南海均夢
耳謫墮本自白玉京惜哉畫史未造極不作散髮
騎長鯨故鄉歸來要有日安得春江變酒從公傾
宿彭山縣通津驛大風鄰園多喬木終夜有聲
木欲靜風不息子欲養親不留夜誦此語涕莫收
吾親之歿今幾秋尙疑捨我而遠遊心冀乘雲反
故邨再拜奉觴陳膳羞陶盎治米聲叟叟木甑炊

眉州屬志

卷十七 詩

四十五

麩香浮浮芼薑屑桂調甘柔稚鼈煮矐長魚脯夜
敷枕席視衾裯晨起薰籠進衣裘哀樂此志終莫
酬有言不聞九泉幽北風歲晚號松楸哀哉萬里
爲食謀

石笋

古院無人僧作佛碧潭有水魚化龍當年諾巨小
遊戲一石擊碎成三峰

杜莘老殿院挽詞三首

王十朋

流落杜莘老平生一飯忠大賢宜有後異代果生

公文艷神藜燭霜蹄御史驄九原呼不起蕭瑟栢臺空

親擢逢明主臺綱振一時觸眞同獬廌問不到狐狸
狡佞已落膽江湖甘抱麾賢哉郭有道無愧蔡邕碑

我昔遊三館聞公論立朝端如平日語果不小人

饒公每云某饒君子不饒小人節義眞齊固年齡不逮喬英魂

已天上楚些詎容招

果溪峽

魏了翁

眉州屬志

卷十七 詩

四十六

寒來晚眺牛羊下翠蕩涵秋野鶴飛風雨燈前話
舊昔應懷坡懶不成歸

巽崖書院

古往今來一貉邛行藏有道坎還流鳳凰池上春
風夢龍鵠山頭夜月秋閒曳深衣聊獨樂有懷連
壁賦三遊何人得與予心會野水沾天一片鷗

李至書樓

前來呼舫下坡隄突兀新樓闖日圍鴈影已隨流
水去鶴皈空感昔人非曩遊歷歷夢中似往事茫

茫知者稀幸有李衡風味好何時倚檻語朝暉

題楊素墓

追思初攝大夫事得助堂前拜舅姑三十三年歸
夢枕一生一死隔黃墟時危剩着人間我境換遙
憐向者吾伯兮叔兮今已矣逝偕衆季勉終圖

鴈湖梅

陰陽互推移氣數有信屈澗松發直枝墅梅醉生
色雖無桃李容依依保終吉

敷文閣李仁甫挽詞五首 周必大

眉州屬志

卷十七 詩

四十七

經學淵源史筆高文章餘力薄風騷紛紛小技誇
流俗磨滅身名笑爾曹

鳴珮甘泉不乏人誰能博古復通今直如汲黯非
遊俠忠似更生不鑄金

手卷長編已刻閩爭傳副墨價千金冠篇不得同
迂叟遺憾猶應記玉音

是是非非口卽心掃除人僞只天真身全五福仍
通貴造物因公勸善人

病後精神更湛然掛冠剛欲及生前去來自在渾

無碍撫掌僧徒浪學禪

黃香樓

李 至

黃雲冉冉曉蒼蒼
閒倚平湖只自香
較似寒梅雖未至
依然風韻挾風霜

北園酌酒觀鶴

靜看瀟灑幾遊鱗
爭似元裳縞袂春
幾度有書招不至
應慚側翅傍他人

和前題

李 壁

仰看翔翮俯遊鱗
物意落落各自春
遙想滄浪五

眉州屬志

卷十七 詩

四十八

君子長身玉立伴閒人

巽巖

蕭條白日閉岩扃
留作遊人萬古情
猶有山中舊麋鹿
舉頭如聽讀書聲

東山精舍

彭山虞公允
文讀書處

木落天清遠嶺多
水平烟盡鏡新磨
周公謝傅皆塵土
病鶴閒來借一柯

慈姥巖

青神

洗盡一春歌酒塵
蒼江吹破碧粼粼
繁華過眼都

如夢祇有三峯是故人

椒溪灘

李 鎰

一梁中截兩山連
雪布寒飛幾竅穿
深鑿却疑通禹穴
長流應不比潮泉
崆峒影裏分三峽
太極圖中會百川
神斧何年平石壁
新題許我得深鑿

金紫巖

李 錫

百尺雲岩道院邊
曉鐘疎磬思悠然
荷間酌酒和清露
石上題詩染翠烟
半嶺泉鳴通古澗
數家秋盡隔寒川
西風似欲吹人起
去逐騎鯨汗漫仙

眉州屬志

卷十七 詩

四十九

晚泊巫山棹石灘

李 稟

黃昏風雨阻江濱
翠綰羣峯暮色勻
一夜子規啼到曉
孤舟愁殺未歸人

鴈湖

史少弼

梅艷凌霜帶雪餘
露華洗盡玉生膚
東方千騎催人去
聊折春風寄鴈湖

南亭

范子長

花木精神面面金
誰將好景作南亭
栗留枝上春風思
鶗鴂聲中脫屣痕
簷後梅樊兄及弟
檻前竹

鶴子生孫我今猶是數旬客遇意忻時卽打門

題樊漢炳墓

許奕

高志崢嶸局九州直從人裏着仙籌青囊書在鬼神泣黃絹詞高冰雪羞槐里但知曾折角蘭臺無復問長頭玉棺夜入青雲去山是人非白鶴愁

家鉉翁字則堂爲樞密使時賈餘慶賣宋令草降詔俾天下州郡附元則堂不書劄程鵬飛欲縛之則堂云中書省無縛執政之理時文信國在北聞其事賦詩云

丞相文天祥

眉州屬志

卷十七 詩

五十

山河四塞盡甌金藝祖高宗實鑒臨一日盡將輸敵手何人賣國獨甘心

中書堂帖下諸城搖首庭中號獨清此後方知樞密事從今北地轉相驚

則堂同丞相吳堅餘慶等奉表北庭號祈請使餘慶賣國則堂欲見北主陳說爲趙家存一脉信國亦有詩云

廷諍堂堂負直聲飄零沙漠若爲情程嬰存趙眞公志賴有忠良壯此行

花卿冢

謝翱

濕雲模糊埋秋空
雨青沙白丹稜東
莓苔陰陰草茸茸
云是花卿古來冢
花卿舊事人所知
花卿古冢知者誰
精靈未歸白日西
廟鴉啄肉枝上啼
綿州柘黃魂正飛

北園

失名

釋金老火戰重圍京洛
緇塵點客衣
輸却北園南閣老
鴈湖欄檻夕陽稀

長山

失名

眉州屬志

卷十七 詩

五十一

望中竒觀亦奚然
萬石崢嶸臨玉泉
銀漢橫邊星錯落
天章依瀆出人間

滄泔泉

張明遠

一滴涓涓晝夜通
滌洄波勢必朝東
酌來應遂貪泉味
今古明良道不同

翠碧軒

姚舜徒

門前世塵網
門裏晝陰碧
好在軒樓人
長老傲松石